

**1 Tesalonaeka**  
**Naoa itəm Pol təmaupən mətə**  
**tuwın kəm iəfak mın ikın**  
**Tesalonaeka**  
**Nəghatən əkuəkır rəha naoa u**  
**1 Tesalonaeka**

**?Pah təmətə naoa u?** Aposol Pol təmətə naoa u.

**?Təmətə tatuwın kəm pah?** Təmətə tatuwın kəm niməfak əpəh Tesalonaeka.

**?Nəmegəhən tahro nulan nian təmətə?** Pol təmətuoun niməfak əpəh Tesalonaeka e nup kəiu o kışil əm tınuwın rəkis, kən in niməfak wi kit. Netəm rəha niməfak okotəkəike kəwiə e nəmegəhən rəhalat. İlat neen, kəmotuwın e nian iəkis mın mətə-inu kotahatətə e Kristo. Kən neen kəsotitun wırən nian itəm İesu otitəlig-pa mın lan e nətueintən. Neen nıkilat təht məmə İesu otuwa uəhai mın əm. Kən motəruru məmə netəmim kəmotimış uarisig e İesu titəlig-pa mın, okahro ilat.

**?Təmətə naoa u o naka?** Pol təmətə naoa u məmə otıləs-ipər nətəligən rəhalat, kən mol nahatətən rəhalat təkəsik. Kən molkeike məmə otos-ipən nəgətunən neen itəm tətuatıp e nitəlig-pa mınən rəha İesu Kristo.

*Pol təmən təwır kəm ilat*

<sup>1</sup> İo Pol, ne Saelas,\* ne Timoti, etəhalən təwır kəm itəmat u niməfak əpəh ikın Tesalonaeka. Itəmat

---

\* **1:1:** E nəghatən Kris, nərgin u Saelas in ‘Silfanus’

nəmotuwa kitiah o Tata Uhgın ne İəramərə İesu Kristo.

Pəs Uhgın otawte-in rəhan nəwırən ne nəməlinuən kəm itəmat.

<sup>2</sup> Nian rafin etəhalən-ipən kəm Uhgın məmə nikitiməhal tagien otəmat, kən mətəhaləfak otəmat e nəfakən rəhatiməhal.

<sup>3</sup> Nian etəhaləfak kəm Tata Uhgın, nikitiməhal tagien məto-inu nian rafin nikitiməhal tatəht nat kışil, kit u rəhatəmat wək itəm tətışi-pən e nahatətən rəhatəmat, ne rəhatəmat wək əskasik o nasituən e netəmim itəm tətışi-pən e nolkeikeən rəhatəmat, ne nolən rəha nətul əskasikən rəhatəmat e nian iəkis min itəm koatuwa e rəhatəmat nəmegəhən, kən nəkotol nəhlan məto-inu nəmotələhəu-pən əskasik rəhatəmat nətəligən e İəramərə İesu Kristo.

<sup>4</sup> Piak min ne wınik min itəm Uhgın tolkeike itəmat. Nikitiməhal tagien min otəmat məto-inu ekəhalitun məmə Uhgın təmitəpun itəmat.

<sup>5</sup> Kən ekəhalitun nat u, məto-inu namnusən təwir itəm eməhalən kəm itəmat, sənəmə təmuwa e nəghatən əm, məto təmuwa min e nəsanənən, ne Narmin Rəha Uhgın, kən kitat kotitun wır məmə in nıpahrienən. Kən nian emotatig kitat min itəmat, nəkotitun məmə nolən rəhatimat in təwir məmə otasitu etəmat.

<sup>6</sup> Kən itəmat nəkotasgəwın itiməhal ne İəramərə e nolən u: nəmotos pap nahməən asol, məto nəmotos nəghatən e nikin agien itəm Narmin Rəha Uhgın təmos-ipinə.

<sup>7</sup> Tol nəhlan, e nolən rəhatəmat nəmotəgətun suatip wır kit kəm iəfak mın əpəh Masetonia ne Akaea məmə kotasgəwin itəmat.

<sup>8</sup> Nəmotən-iarəp nəghatən rəha Uhgın tahmen e təwi təmasək kəto ikin mın rafin, kən sənəmə əpəh Masetonia ne Akaea əm, məto netənim ikin mın rafin kotitun rəhatəmat nahatətəən. ? Kən ekəhaləkəike məhalən-iarəp namnusən rəha nahatətəən rəhatəmat, o kəp?

<sup>9</sup> Kəp, məto-inu ilat atip koatən-iarəp məmə nian emotuwa moatəplan itəmat, nikitəmat tagien o nətoən nəghatən rəhatiməhal. Koatən-iarəp məmə itəmat nəmotəuhlin məntaatəmat o narmı nat mın, kən motuarisig-in Uhgın itəm tatəmegəh, kən in Uhgın pahrien,

<sup>10</sup> kən nakoatəsağin Nətin u Iesu, itəm təmisi-pən e nego e neai, kən Uhgın təmosmegəh in e nımisən, kən in otosmegəh kitat o nalpınən ne neməha rəha Uhgın itəm tatuwa.

## 2

### *Wək rəha Pol əpəh Tesalonaeka*

<sup>1</sup> Piak mın ne winik mın. Nəkotitun məmə nian itiməhal eməhaluwa məhalehm itəmat, nuwamən rəhatiməhal, in sənəmə tol nat əpnəpın əm, məto təmol noan.

<sup>2</sup> Kən itəmat nəkotitun məmə əpəh Filipae, netənim kəmotol tərət kəm itiməhal, kən motəhai motən rat itiməhal, məto Uhgın rəhatat təmasitu etiməhal, kən itiməhal esəhaləginən nən-iarəpən rəhan namnusən təwır kəm itəmat, nat əpnəpın netənim kəmotalkut məmə okotən-iəhau itiməhal.

<sup>3</sup> Tol nəhlan məto-inu rəhatiməhal nəghatən o niuwən rəhatəmat nətəligən təsietən e nətəligən rat min o nikin itəm təsətuatipən, kən esəhlalkutən o neiuə-inən itəmat.

<sup>4</sup> Kəp, esəhalolən nəhlan. Məto nian etəhaləghat, ekəhalitun məmə Uhgın təmuag-pən rəkis e nikitiməhal, kən təmən məmə itiməhal etəhalahmen məmə etəhalən-iarəp namnusən təwir, kən in təmələhəu-pən e nelmitiməhal. Kən ekəsahləghatən məmə netəmim nīkilat otagien otiməhal, məto etəhaləghat məmə Uhgın nikin otagien otiməhal, kən in Uhgın itəm tatuag-pən e nikitiməhal.

<sup>5</sup> Nəkotitun məmə itiməhal esəhaluwamən otəmat məmə ekəhaliuw nətəligən rəhatəmat e nəghatən ətehen min. Kən esəhalən-iarəpən namnusən təwir kəm itəmat məmə ekəhalos rəhatəmat məni. Kən Uhgın, in titun nikitiməhal məmə nəghatən u in nīpahrienən.

<sup>6</sup> Itiməhal esəhaluwamən məmə itəmat kit o etəmim əpnəpən əm kit otələs-ipər itiməhal.

<sup>7</sup> Kən nat kit min, məto-inu itiməhal aposol min rəha Kristo, ekəhalitun nənən məmə nəkotəkəike motisiai-in itiməhal tahmen e etəm-iasol miləhal, məto eməsəhalolən. Nian etəhlatig kitat min itəmat, nolən rəhatiməhal tīmətig tahmen e mama kit itəm tatehm wir nətin min.

<sup>8</sup> Nikitiməhal tagien məmə ekəhalən-iarəp namnusən təwir, məto sənəmə məmə ekəhalən-iarəp əm, məto eməhalol natimnat rafin itəm ekəhalitun nolən məmə otasitu etəmat. In tahmen məmə eməhalos-ipinə nəmegəhən rəhatiməhal, məto-inu itiməhal eməhalolkeike itəmat, kən nəmotuwa

rəhatiməhal netənim.

<sup>9</sup> Piak mɪn ne wɪnɪk mɪn. ?Nɪkɪtəmat tataht, o kəp, wək əskasɪk itəm eməhalol? Nian itiməhal emətəhlamnus-iarəp namnusən təwir rəha Uhgɪn kəm itəmat, itiməhal eməhalol wək e nelmitiməhal laulaugin mətoarus-pən lapɪn məmə esəhalətapəh-inən nat kit otəmat.

<sup>10</sup> Itəmat ne Uhgɪn, nəmotəplan kən motɪtun nən-iarəpən məmə nian emətəhlatig kitat min itəmat iəfak mɪn, nolən rəhatiməhal in tətuatɪp, kən Uhgɪn tətagiən lan, kən etənim kit təsosən nɪpəgnəmtɪn kit itəm tərat otiməhal.

<sup>11</sup> Itəmat nəkotɪtun məmə itiməhal eməhalol təwir kəm itəmat rafɪn tahmen e tata kit tatehm wɪr nenətɪn mɪn.

<sup>12</sup> Kən e nolən kitɪəh əm, etəhalem əskasɪk itəmat, kən mətəhalɪləs-ɪpər rəhatəmat nətəligən, mətəhalətapəh əskasɪk məmə nəmegəhən rəhatəmat otətuatɪp e nɪganəmtɪ Uhgɪn, kən nɪkɪn tagiən lan. Uhgɪn u, tətəun-in itəmat məmə nakotuwa e nərəmərəən ne nəwɪrən rəhan.

<sup>13</sup> Kən nian rafɪn, itiməhal ekəhalən tagkiu kəm Uhgɪn məto-inu nian nəmotos nəghatən rəha Uhgɪn itəm nəmotəto otiməhal, kən motos tatig e nɪkɪtəmat, kən nɪkɪtəmat təsəhtən məmə in nəghatən rəha netənim əm, məto nɪkɪtəmat təht məmə in nəghatən rəha Uhgɪn, kən pahriən in nəghatən rəhan. Kən nəghatən u tatol wək e nəmegəhən rəhatəmat, netəm nakoatən nɪpahriənən lan.

<sup>14</sup> Kən piak mɪn ne wɪnɪk mɪn, nəmotos nəratən tahmen e nɪməfak mɪn rəha Uhgɪn e Kristo Iesu əpəh Jutia aupən. Nat əpnəpɪn məmə ilat netənim

imatəmat atip ikin, məto ilat kəmotol terat kəm itəmat tahmen əm e noanol min rəha Isrel kəmotol tərət kəm iəfak min əpəh Jutia.

<sup>15</sup> Kəmotohamnu Iərəmərə Iesu, ne ien min, kən motəhg-iarəp itimat ekotiet. Nolən rəhalat tatol niki Uhgın təsagienən, kən ilat tikimir min o netəmin rafin,

<sup>16</sup> məto-inu kotalkut məmə okotən-iəhau itimat o nəghatən kəm Iaihlua min məmə Uhgın otosmegəh ilat. E nolən əh, ilat koatuargətəin rəhalat nolən rat mətoarus tahmen. Məto roiu əh, neməha ne nalpınən rəha Uhgın tīnuwa olat.

### *Pol təmolkeike məmə otəplan ilat*

<sup>17</sup> Piak min ne winik min. Nian eməhaluwın isəu otəmat nian noan məsın əm, məto eməhalolkeike pik məmə ekəhaləplan min itəmat. Nipahrienən, nipətitat isəu otat min, məto nətəligən rəhatat kitiah. Kən eməhlalkut pik məmə ekəhalitəlig məhaləplan itəmat,

<sup>18</sup> məto-inu eməhalolkeike məmə ekəhalimnə otəmat. Io, Pol, emalkut nian tərət, məto Setan təmahtosig-in suatip otiməhal.

<sup>19</sup> ?Tahro ekəhalolkeike pik məmə ekəhaləplan min itəmat? ?Tol nəhlan məto-inu, nian Iərəmərə Iesu otuwa min, pah min un eməhalələhəu-pən nətəligən əskasik rəhatiməhal elat məmə ilat noa wək wir rəhatiməhal? ?Kən nikitiməhal otagien min o pah min? ?Kən pah min un in rəhatiməhal nətouən itəm nikitiməhal otagien elat? ?Itəmat, o kəp? Əwəh, itəmat u.

<sup>20</sup> Nipahrienən, itiməhal ekəhlausit otəmat, kən nikitiməhal tagien otəmat.

### 3

<sup>1</sup> Tol nəhlan, nian nikitiməhal təməpou kən iuəhkir nikitiməhal titəgət, məto-inu itiməhal ekəhaləruru məmə nəkotatig təwir əm o kəp, kən itiməhal eməhaləlis nəghatən məmə io ne Saelas ekətuatig Atens,

<sup>2</sup> emuahl-ipinə Timoti məmə in otimnə məplan itəmat. In piatat kit itəm tatol wək rəha Uhgın itiməhal min o nən-iarəpən nəghatən rəha Uhgın. In təminəh otəmat məmə otasitu etəmat mīləs-ipər rəhatəmat nətəligən, kən mol itəmat nəkoatətul əskasik e rəhatəmat nahatətəən,

<sup>3</sup> məmə nərətən itəm tatuwa roiu, okol təsolən nikitəmat təht pik. Nəkotitun rəkis məmə in nətəligən rəha Uhgın məmə netənim okotol tərət etat nəhlan.

<sup>4</sup> Nipahrienən, nian emətəhlatig kitat min itəmat, eməhaləkəike mətəhalən kəm itəmat məmə okol tərət kəm kitat. Kən itəmat nəkotitun wir məmə tinuwa mol nipahrien lan tahmen əm məmə itiməhal eməhalən mihin.

<sup>5</sup> O nat əh, nian nikitiməhal təməpou kən iuəhkir nikitiməhal titəgət, kən emahl-ipinə Timoti məmə otimnə məplan-tu rəhatəmat nahatətəən, məmə tatəskasik əh, o kəp. Ekatəgin məmə e suatip kit, Setan u etənim rəha nos-ipən-os-ipənən, in tos-ipən-os-ipən kəm itəmat, kən wək rəhatiməhal in tol nat əpnəpən əm.

*Timoti təmən-iarəp namnusən təwir*

<sup>6</sup> Kən roiu əh, Timoti təmitəlig-pa mın otımlau, kən matos namnusən təwir e rəhatəmat nahatətəən ne nolkeikeən. Təmən-ipa kəm itımlau məmə nikitəmat tatəht əh itıməhal e nagiənən, kən motolkeike məmə nəkotəplan itıməhal, təhmen əm məmə itıməhal ekəhalolkeike məmə ekəhaləplan itəmat.

<sup>7</sup> Tol nəhlan, piak mın ne wınik mın, nat əpnəpın eməhlatig e nəratən, kən mətəhaləto nahməən, məto namnusən rəha nahatətəən rəhatəmat təmiləs-ipər rəhatıməhal nətəligən otəmat.

<sup>8</sup> Nian eməhalos namnusən məmə nəkoatətul əskasik əh o İərəməərə, kən ekəhaləto məmə enəhalos mın nəmegəhən.

<sup>9</sup> Nian ekəhalətul e niganəmti Uhgın, nagiənən rəhatıməhal otəmat in iaɦgın, kən ekəhalən kəm Uhgın məmə nikitıməhal tagien pik otəmat.

<sup>10</sup> E nian rafın, nərauiəgən ne lapın, etəhaləfak əskasik məmə ekəhaləplan mın itəmat, kən məhaləgətun itəmat e nat naka nəkotəruru əh məmə rəhatəmat nahatətəən otəwiə məskasik.

<sup>11</sup> Kən pəs rəhatat Uhgın atıp, u Tata rəhatat, ne İərəməərə İesu rəhatat, kioal suatıp rəhatıməhal məmə ekəhalımnə məhalehm itəmat.

<sup>12</sup> Pəs İərəməərə tol nolkeikeən rəhatəmat otepət mər mərioah otəmat ne netəmim rafın, təhmen e nolkeikeən rəhatıməhal otəmat tepət.

<sup>13</sup> Pəs in tol nikitəmat təsanən məmə, nian İərəməərə İesu tatuwa mın ilat rəhan mın netəmim, kən nakotətul e niganəmti rəhatat Uhgın u Tata rəhatat, kən nəkotətuatıp kən nolən kit tikə məmə otıləs pikən itəmat.



## 4

*Nāmegāhān rāhatāmat tākāike mol Uhgīn nīkin tagien*

<sup>1</sup> Piak mīn ne wīnik mīn, roiu ekāike māghat e natimnat mīn neen. Emāhalāgātun rākis etāmat nolān naka itēm nākotol māmā Uhgīn nīkin otāgien otāmat. Kān pahrien, nākoatol mihin. Kān roiu etāhalātapāh otāmat kān mātāhalātapāh āskasik e Iārāmārā Iesu māmā nākoatol ām nulan tatuwīn matuwīn māsīn mīn.

<sup>2</sup> Otol nāhlan mātō-inu itāmat nākotitun suatīp itēm emāhalāgātun itāmat lan e nārāmārān rāha Iārāmārā Iesu.

<sup>3</sup> Nātēligān rāha Uhgīn māmā in tāmēlēhāu kalin itāmat māmā rāhan mīn māmā nākoatol nat itēm tātūatīp wīr: sotātāu-pānān suatīp rāha nīpitan ne nāman itēm koatit anion ilat mīn.

<sup>4</sup> Itāmat kitiāh kitiāh nākotākāike motārāmārā e nīpētītāmat e nolān itēm tēwīr mātūatīp kān kātīsiāi-in.

<sup>5</sup> Sotolān nolān rāha nātāu-pānān nātēligān āskasik o nit anionān pētān o iārman. Nolān āh rāha netām kāsotāfakān kotāruru Uhgīn.

<sup>6</sup> Kān e natimnat mīn āh, sotolān tērat e piatāmat mīn o naklēh-inān pētān rāha suah pīsīn. Iārāmārā otol nalpīnān kām netām mīn u itēm kotol nolān mīn itēm tol nāhlan, kān enāhalān rākis nat u kām itāmat o nāhgāiirān etāmat.

<sup>7</sup> Tol nāhlan mātō-inu Uhgīn tāmēsaun-inān kitat māmā okotāmkīmīk e nīgānāmtīn, mātō okotatīg e nāmegāhān itēm kāmotēlēhāu kalin māmā rāhan.

8 Tol nəhlan, etəm tatəuhlin məntaan e nəgətunən əh, sənəmə tatəuhlin məntaan kəm etəmim, məto tatəuhlin məntaan kəm Uhgın itəm təmos-ipa Narmın Rəhan kəm itəmat.

9 Nəkotitun rəkis nolən rəha nolkeikeən itəmat iəfak mın, kən inu sənəmə nat kit itəm ekəkəike məte e naoa, məto-inu Uhgın təməgətun rəkis itəmat o nolkeikeən itəmat mın.

10 Kən pahrien, nakotolkeike piatat mın rafin ikin Masetonia. Məto, piak mın ne wɪnɪk mın, ekəhalətapəh əskasik məmə nəkotol mihin tatuwın nulan məsın mın.

11 Itəmat nəkotəkəike motalkut o nətəu-pənən suatip rəha nəmegəhən itəm in təməlinu, kən motol atip rəhatəmat wək, kən nəkotol wək e nelmitəmat təhmen əm məmə eməhalən mihin kəm itəmat.

12 Otol nəhlan məmə rəhatəmat nəmegəhən otıuw-pa nisaiiən rəha netəm ihluə mın, kən itəmat nəsotagileən e suah kit.

### *Nuwamən rəha İərəməə*

13 Piak mın ne wɪnɪk mın. Ekəhalolkeike məmə itəmat nəkotəkəike motitun netəm mın u itəm kəmotimıs. Kən esəhalolkeikeən məmə itəmat nakotasək təhmen e netəmim itəm kəsotələhəu-pənən rəhalat nətəligən e Uhgın.

14 Kitat kotahatətə məmə İesu təmimıs kən məmegəh mın, kən nikitat titun məmə nian İesu otuwa mın, kən Uhgın otol məmə, netəm mın u itəm kinotahatətə rəkis e İesu nian kəmotimıs, okotuwa mın ilat İesu.

15 Kən ekəhalən kəm itəmat nəghatən ətuatip rəha İərəməə məmə, kitat u itəm koatəmegəh

---

4:8: Luk 10:16; 2 Kor 1:22

4:9: Jon 13:34

4:11: Efes 4:28

4:14: Rom 14:9; 1 Kor 15:3-4,12

əh motatig mətoarus nuwamən rəha İərəmərə, pahrien kitat okol kəsotaupən-inən netəm mın u itəm kəmotaupən kəmotimis.

<sup>16</sup> Məto İərəmərə ətuatip əm oteiuaiu-pa e nego e neai, kən mən-iarəp əfəməh, kən etəm-iasol rəha nagelo mın otagət əfəməh, kən netəmim okotəto təwi rəha Uhgın, kən netəm mın u itəm kinotahətətə rəkis e İesu nian kəmotimis, okotəmegəh motaupən motər.

<sup>17</sup> Kən uarisig lan, kitat netəm koatəmegəh əh motatig, okotər kitat mın ilat e nimal napuə məmə okotəplan İərəmərə e magoagəp. Kən tol nəhlan, okotatig kitat İərəmərə nammun tikə.

<sup>18</sup> Tol nəhlan, otıləs-ipər nətəligən rəhatəmat mın e nəghatən mın u.

## 5

<sup>1</sup> Piak mın ne winik mın. Təwir əm məmə esətəən kəm itəmat e nian ətuatip rəha natimnat mın əh,

<sup>2</sup> məto-inu itəmat nəkotitun rəkis məmə Nian Rəha İərəmərə otuwa tahmen e iakləh itəm tatuwa lapın, nian netəmim kotəruru.

<sup>3</sup> Nian netəmim koatən məmə, “Natimnat rafın təməlinu, kən nəratən tikə,” kən nəratən otuwa olat uəhai əm, tahmen e pətan itəm məntaan tıtahmə o neməkən, kən okol netəmim kəsotagımən.

<sup>4</sup> Məto piak mın ne winik mın, nətotətulən e napınəpən e natimnat mın əh, kən nuwamən rəha nian əh otəsölən itəmat nəkotaut tahmen e nuwamən rəha iakləh kit.

<sup>5</sup> Itamat rafin nenəti nəhag-əhagən ne nenəti nianən. Kitat sənəmə netəmim rəha lapin ne napinəpən.

<sup>6</sup> Kən tol nəhlan, pəs kəsotolən tahmen e netəm min u kotapil, məto pəs kotaiir kən moatehm wır rəhatat nətəligən ne rəhatat nolən min,

<sup>7</sup> məto-inu netəm min u koatapil, ilat koatapil lapin, kən netəm min u itəm koatapis, ilat koatapis lapin.

<sup>8</sup> Məto pəs kitat kotərəməərə e rəhatat nolən min, məto-inu kitat netəm rəha nianən. Pəs kotaskəlim nolən rəha nahatətəən ne nolkeikeən, inu tahmen e mopael kit itəm tatuwin-in iaen kit itəm tatətlosig-in manikiləhatəm, kən pəs kotələhəu-pən əskasik rəhatat nətəligən e Uhgın, inu tahmen e mopael kit itəm tatuwin-in hat əskasik kəmol e iaen itəm tatəfətəin rəhn-kapətəm.

<sup>9</sup> Pəs kotol nəhlan məto-inu Uhgın təsitəpunən kitat məmə neməha ne nalpinən rəhan otuwa otat, məto təmitəpun kitat məmə in otosmegəh kitat e rəhatat İərəməərə İesu Kristo.

<sup>10</sup> Təmimis otat məmə kitat kotitun natigən kitiah kitat min okəmə koatəmegəh o kəmotimis.

<sup>11</sup> Tol nəhlan, otələs-ipər rəhatəmat min nətəligən, kən otasitu etəmat min məmə natol nahatətəən rəhatəmat təskasik. Pahrien, inu nolən itəmat nəkotol u-roiu.

### *Namnun nəghatən rəha Pol*

<sup>12</sup> Piak min ne winik min. Roiu ekəhalətapəh otəmat məmə nakotisiai-in netəm min u koatol wək əskasik itəmat min ilat, moatərəməərə etəmat

e Iærəmərə, kən moatən kəm itəmat nian nəkoatol tərət.

<sup>13</sup> Otisiai-in wır ilat motolkeike ilat o wək itəm koatol, kən motatig e nəməlinuən itəmat min itəmat min.

<sup>14</sup> Kən piak min ne winik min, etəhalətapəh əskasik məmə nakotəghat əskasik kəm netəm min u kəsotolən nat kit. Otıləs-ipər nətəligən rəha netəm nikilat təpou. Otasitu e netəm itəm rəhalat nəsanənən tikə. Otol rəhatəmat nətəligən təfəməh kəm netəmim rafin.

<sup>15</sup> Okəmə suah kit otol nat kit təsahmenən etəmat, kən itəmat nəsotalpınən nıtai nərətən, məto nian rafin, itəmat nəkotəkəike motalkut məmə nəkoatol təwır kəm itəmat min ne netəmim pisin min.

<sup>16</sup> Nikitəmat otəkəike mətagien nian rafin;

<sup>17</sup> kən moatəghat kəm Uhgın e nəfakən nian rafin;

<sup>18</sup> kən nian rafin otən kəm Uhgın məmə nikitəmat tagien, nat əpnapın nəkotatig e nəwırən, o nərətən. Otol nat miləhal əh məto-inu iləhal nəwıa Uhgın otəmat e Kristo Iesu.

<sup>19</sup> Sotahləmisən nigəm rəha Narmın Rəha Uhgın;

<sup>20</sup> əsotənən məmə nəghatən itəm Uhgın təmosipinə kəm suah kit, in tol nat əpnapın əm lan.

<sup>21</sup> Otəplan wır kən motakil wır natimnat rafin, kən otaskəlīm tiəkis nat itəm təwır,

<sup>22</sup> kən motapəs natimnat rafin itəm tərət.

<sup>23</sup> Pəs Uhgın pisin əm itəm in Uhgın rəha nəməlinuən, otol itəmat məmə rəhan pisin əm

---

5:14: 2 Tes 3:6,11

5:15: Rom 12:17; 1 Pita 3:9

5:16: Fil 4:4

5:18: Efes 5:20

5:19: Efes 4:30

5:22: 1 Jon 4:1

un itəmat. Pəs Uhgın otol məmə narmin rafin rəhatəmat, ne nəmegəhən rafin rəhatəmat, ne nıpətıtəmat rafin okotətuatıp məmə nıpəgnəmtin tikə otəkul-pən etəmat nian rəhatat İərəməərə İesu Kristo tatuwa min.

<sup>24</sup> Etəm tətəun-in itəmat, nian rafin tatol rəhan nəghatən, kən in otol natimnat min əh.

<sup>25</sup> Piak min ne winik min. Otəfak otimat.

<sup>26</sup> Otən təwir kəm itəmat min tahmen məmə itəmat kitiaħ əm e Kristo.

<sup>27</sup> E nərgi İərəməərə, iatən əskasik kəm itəmat məmə nakotafin naoa u kəm piak min ne winik min rafin.

<sup>28</sup> Pəs rəhatat İərəməərə İesu Kristo otawte-in rəhan nəwırən kəm itəmat.

**North Tanna New Testament**  
**The New Testament in the North Tanna Language of**  
**Vanuatu**  
**Le Nouveau Testament dans la langue du Nord Tanna**  
**de Vanuatu**

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

46e9a2b5-26b8-5301-a079-623f3a20ef8b